

100 китоб тўплами

БЕДАНАЛАРНИ ПАРВАРИШЛАШ

84-китоб



**Қишлоқ хўжалигини илмий асосда йўлга қўймас
эканмиз, соҳада ривожланиш бўлмайди.**

Ш. МИРЗИЁЕВ.

Ҳурматли деҳқонлар, чорвадорлар, тадбиркорлар!

Жаҳон миқёсида аҳолининг озиқ-овқат хавфсизлигини таъминлашда аграр соҳанинг ўрни ва аҳамияти кундан-кунга ошиб бормоқда. Жумладан, мамлакатимизда ҳам мавжуд ресурс ва имкониятлардан оқилона фойдаланиб, аҳолини қишлоқ хўжалик маҳсулотлари билан кафолатли таъминлаш, ҳосилдорлик ва манфаатдорликни янада ошириш, соҳага илм-фан ютуқлари ҳамда замонавий ёндашувларни жорий этиш долзарб масаладир.

Муҳтарам Президентимиз Шавкат Мирзиёев 2020 йил 29 декабрь куни Олий Мажлисга йўллаган Мурожаатномасида, камбағалликни қисқартириш ва қишлоқ аҳолиси даромадларини кўпайтиришда энг тез натижа берадиган омил бу – қишлоқ хўжалигида ҳосилдорлик ва самарадорликни кескин ошириш эканлигини алоҳида таъкидлаб ўтдилар.

Бу жараёнда ҳар гектар ердан олинадиган даромадни ҳозирги ўртача 2 минг доллардан камида 5 минг долларгача етказиш устувор вазифа қилиб қўйилди ва қишлоқ хўжалигига энг илғор технологиялар, сувни тежайдиган ва биотехнологияларни, уруғчилик, илм-фан ва инновациялар соҳасидаги ютуқларни кенг жорий этишимиз лозимлиги белгилаб берилди.

“Агробанк” АТБ мамлакатимизда қишлоқ хўжалиги соҳасининг барқарор ривожланишига ҳисса қўшиш учун нафақат молиявий, балки ижтимоий лойиҳалар билан ҳам аграр соҳага сармоя киритишга эътибор қаратмоқда.

Жумладан, ривожланган давлатлар қишлоқ хўжалигида эришилган ютуқлар ҳамда тажрибалар асосида соҳанинг етук мутахассислари, олимлари билан ҳамкорликда фермерлар ва аҳоли учун дастлабки босқичда ушбу 100 та китобдан иборат қўлланмалар тўплами тайёрланди.

Тўпلامда қишлоқ хўжалиги соҳаси, жумладан, мева-сабзавот ва полиз экинларини асосий ҳамда такрорий экиш муддатида етиштириш, иссиқхоналарда маҳсулот ишлаб чиқариш, ғаллачилик, дон ва дуккакли экинлар, чорвачилик, балиқчилик, асаларичилик каби тармоқларнинг энг илғор тажрибаларига оид кенг қамровли илмий ва амалий маълумотлар берилган.

Ушбу лойиҳани келажакда тажрибали деҳқон ва фермерларимиз, чорвадор ва ветеринарларимиз, аграр соҳа вакиллари ва бошқа китобхонларимиз фикр-мулоҳазалари ҳамда таклифлари асосида янада такомиллаштираемиз.

Умид қиламизки, ушбу қўлланмалар тўплами Сиз – деҳқонлар, чорвадорлар ва тадбиркорларимиз учун фойдали бўлади.

Ҳосилингиз мўл-кўл, даромадингиз баракали бўлсин!

**Рустам МАМАТҚУЛОВ,
“Агробанк” АТБ бошқарув раиси.**

УЎК 639.122**КБК 46.8****Б46**

Лойиҳа ғояси муаллифи ва ташкилотчи: “Агробанк” АТБ
Тузувчилар:

А. Х. Холматов – Чорвачилик ва паррандачилик илмий-тадқиқот институти “Иммуногенетика” лабораторияси мудири, қ.х.ф.н.

И. Т. Нормуратов – Тошкент давлат аграр университети Мевачилик ва узумчилик кафедраси мудири қ.х.ф.д. профессор.

Тақризчилар:

С. И. Мавланов – Ветеринария фанлари доктори

К. И. Хидиров – Чорвачилик ва паррандачилик илмий-тадқиқот институти, катта илмий ходими.

Қ. Ж. Шокиров – Тошкент давлат аграр университети, Умумий зоотехника кафедраси доценти, қ.х.ф.д.

Лойиҳа иштирокчилари:

У. Ф. Фаизуллаев, М. С. Ҳайитбоев.

Муҳаррир:

Т. Долиев – “Ўзбекистон қишлоқ ва сув хўжалиги” журнали бош муҳаррири.

Ушбу қўлланма “Агробанк” АТБ муассислигида тайёрланди ҳамда нашр эттирилди. Билдирилган фикр-мулоҳаза, хулоса ва тавсияларга тузувчи муаллифлар масъулдир.

Ижтимоий лойиҳалар билан аграр соҳага сармоя киритиш доира-сида “Агробанк” АТБ томонидан 100 та китобдан иборат қўлланмалар тўплами тайёрланди. Тўпланда қишлоқ хўжалиги соҳаси, жумладан, мева-сабзавот ва полиз экинлари, ғаллачилик, чорвачилик, балиқчилик, асаларичилик каби тармоқларнинг энг илғор тажрибаларига оид ривожланган давлатлар ва юртимизда эришилган кенг қамровли илмий ва амалий маълумотлар қамраб олинган.

Тўплам мазкур йўналишдаги биринчи нашр бўлиб, келгусида ушбу лойиҳани давом эттириш мақсадида билдирилган фикр-мулоҳазалар ва таклифлар асосида янада бойитиб бориш кўзда тутилган.

Қўлланма соҳа мутахассислари, фермерлар ва кенг жамоатчилик учун мўлжалланган.

Ушбу қўлланма “Агробанк” АТБ тухфасидир

© “Агробанк” АТБ – 2021

© Нашриёт уйи “Тасвир” – 2021

© “Colorpack” МЧЖ – 2021

ISBN 978-9943-7174-0-4

■ I МУНДАРИЖА

Кириш.....	7
Бедананинг хусусиятлари.....	8
Уй беданаларининг зотлари.....	9
Сақлаш ва парвариш қилиш.....	13
Беданани озиклантириш.....	20
Донли озуқалар.....	23
Табиий ўсимликлар.....	24
Протеин	24
Минерал моддалар ва майда тошлар.....	25
Сув	26
Озуқа қўшимчалари ва витаминлар.....	26
Беданаларни кўпайтириш.....	29
Инкубация.....	31
Ёш беданаларни ўстириш.....	32
Ўстириш хусусиятлари.....	35
Ёш беданаларни озиклантириш.....	36
Озиклантириш турлари.....	37
Ўштга семиртириш.....	41
Беданани сўйиш.....	42
Фойдаланилган адабиётлар рўйхати	44

■ I КИРИШ

Инсоннинг овқатланишида энг муҳим озуқа компоненти ҳайвонларга оид бўлган оксил моддаси ҳисобланади. Бедана гўшти ва тухумида нафақат организм учун зарур бўлган қимматли оксил моддаси, балки бошқа фойдали бўлган мувозанатлаштирилган моддалар ҳам мавжуд.

Уй беданасининг тухум, гўшт (бедана-бройлер) йўналишидаги зотлари ҳамда жангари, декоратив, рангдор зотлари маълум. Тухум йўналишидаги зотли беданаларни парвариш ва боқиш иқтисодий самарадорлиги жиҳатидан ҳам мақсадга мувофиқ ҳисобланади.

Бедананинг “Япон” зоти тухумдорлиги бошқа зотларга қараганда анча сермахсул бўлиб, ҳар бир макиён бедана йилига ўртача 300 донадан тухум беради. Бошқа саноат парранда турларига нисбатан беданаларда тухум вазни тана вазнига нисбати юқори кўрсаткични ташкил қилади.

Турли манбалардан маълумки, бедана тухумлари товуқ тухумларига нисбатан A, PP, B₁, B₂ витаминлари ва минерал моддалар таркиби бўйича ўнлаб фоиз юқори, айрим кўрсаткичлар бўйича эса бир неча баробар юқори кўрсаткичларга эга. Бедана тухуми таркибидаги оксиллар, ёғлар, углеводлар ва минерал моддаларнинг нисбати ўзгача тақдорланмас бўлиб, инсон организми учун деярли жуда мос келади.

Энг кўп тарқалган бедананинг “Япон” зоти тухумининг ўртача оғирлиги 9-12 граммни ташкил этади. Бедана тухуми одатда тўқ жигарранг ёки устида кўк рангли доғлар билан қопланган бўлади. Ҳар бир макиённинг тухум қобиғида ўзига хос бўлган доғлар тасвири бўлади. Осиё давлатлари халқлари орасида уйда бедана

сақлаш омад ва муваффақият гарови ҳисобланади.

Юрак, камқонлик, гипертония, гастрит, ошқозон яраси, қандли диабет, астма, туберкулёз, пневмония, анемия ва айрим кўз касалликларида бедана тухуми ва гўштини истеъмол қилиб туриш шу хасталикларга қарши шифобахш дармон ҳисобланади ва жуда катта ёрдам беради. Нурланиш касаллигида бедана тухуми радионуклидларни организмдан чиқариш хусусиятига эга. Ҳар бир соғлом инсон учун ҳар куни эрталаб ва кечқурун 3 донадан бедана тухумини 1,5 ой давомида истеъмол қилиш тавсия этилади.

Бедананинг “Япон” зоти макиёнлари катакда 1,5 ойдан бошлаб тухумга киради, ваҳоланки товуклар 4-5 ойдан, туяқушлар 2-3 ёшдан бошлаб тухумга киради. Беданалар касалликларга чидамлилиги, жўжа очиб чиқариш фоизи, гўштининг таъм сифатлари ва кўплаб бошқа кўрсаткичлар бўйича товукларга нисбатан анча юқори кўрсаткичларга эга. Бедана макиёнлари хўрозларига нисбатан одатда йирикрок бўлади.

БЕДАНАНИНГ ХУСУСИЯТЛАРИ

Беданалар анчагина ҳуркак парранда бўлиб, парваришlashда эҳтиёткорликни талаб этади. Чўчиб кетган беданалар саросимага тушиб, учиб кетишга ҳаракат қилади, ўзларини катакларга уради. Узоқ вақт стресс ҳолатига тушиб қолган беданалар бўйинини эгиб, гавдасини ерга босиб учиги тайёргарлик кўраётгандек бўлади. Тўқ ва хотиржам ҳолатдаги паррандалар бир жойда кам ҳаракатда бўлиб, мудраб ўтиришади.

Бир бош бедана хўрози ва 3-10 бош бедана макиёнларини катакда боқишда кунига ўртача 2-9 тадан тухум олиниши

кузатилган. Беданаларни иложи борица катта галаларда сақлаш юқори махсулдорлик (тухум олиш) учун омил бўлади. Тухум қўйишни тушдан олдин одат қилган товуклардан фарқли ўлароқ макиёнлар одатда кечкурун, сокинлик пайтида тухум қўйишади. Кўпинча озиклангандан кейин дарҳол тухум қўйиши ҳам мумкин. Тухум қўйишдан олдин макиёнлар безовта бўлиб чийиллаган овоз чиқаришади ва тухум қўйиш вақтида бошини орқага ташлайди. Қариган бедана макиёнлари ўз вақтида сўйилмаса тухум қўйишдан тўхтайди ва ёш хўрозчалар уларни чўқиб ўлдиришлари мумкин. Агар ёш хўрозча қари макиён бедана орқасидан қувиб юрган бўлса, дарҳол бедана макиёнини бошқа катакка ажратилиб, семиртириш учун кучли озуқалар билан боқилади ва гўштга сўйилади. Айрим ёш беданаларнинг кўзини юмиб, бўйни ва оёғини узайтириб чўзилиб ётиши ўлаётган бедананинг аҳволини эслатади, аслида эса бу бедана шундай йўл билан дам олиб, ухлаётган бўлади.

■ I УЙ БЕДАНАЛАРИНИНГ ЗОТЛАРИ

Беданаларнинг зотлари, чатиштирилган ва мутант шакллари бир-биридан экстерьерлари, патлар ранги, тана вазни ва ҳажми, жўжаларининг тухумдан чиқиш фоизи, тухум бериши ва бошқа кўрсаткичлари бўйича фарқ қилади.

Бедананинг “Япон” зоти кўп миқдорда тухум бериши, касалликларга чидамлилиги ва жўжаларининг тухумдан чиқиш фоизи юқорилиги (90% атрофида) билан ажралиб туради.



Япон зоти

Бедананинг “Фараон” зоти юқори сифатли гўшт олишга мўлжалланган. У ҳақиқий бедана-бройлер ҳисобланади. Уларнинг тирик вазни япон зотидан 40 фоиз юқори бўлади.



Фараон зоти

“Эстония” зоти кўп тухум бериши (йилига 310 дона) ҳамда гўштининг алоҳида ўзига хос мазали таъми билан ажралиб туради. Бедананинг “Француз” ва “Эстония” зотлари 45 кунлик ёшида тирик вазни 280-300 граммни ташкил этади.

*Эстония зоти*

“Британия қора” зоти ўзига хос патлар рангига эга бўлиб, макиёнлар тирик вазнининг оғирлиги 210 граммни ташкил этади.

*Британия қора зоти*

Бундан ташқари беданаларнинг Америка альбинос бройлерлари, Англия оқ зоти, Маньчжур тилла ранги, Смокинг (тукседо), Мармар ранг, Австралия сариқ-жигарранг зотлари ҳам мавжуд.

*Маньчжур тилла ранг зоти**Англия оқ зоти**Мармар зоти**Смокинг зоти*

Хитой зотли беданалар декоратив мақсадларда боқилади. Бундан ташқари, декоратив мақсадда боқиладиган Калифорния, Жигарранг пахмоқли, Тангачалик ва Виржиния зотлари ҳам маълум. Айрим ҳолларда Виржиния зотини гўшти учун ҳам етиштирадилар.



Калифорния зоти



Тангачадор зоти



Виржиния зоти



■ I САҚЛАШ ВА ПАРВАРИШ ҚИЛИШ

Тарихда инсон беданани тўлиқ қўлга ўргатишнинг уddасидан чиқа олмаган, шунинг учун ярим ёввойи бўлган беданаларни катакларда боқиш тавсия этилади. Бедана боқилаётган бино хонаси яхши иситилиши, вентиляция мавжудлиги ва сунъий ёритиш тизимларига эга бўлиши керак. Электр энергияси билан узлуксиз таъминлаш учун қўшимча электр таъминотига эга бўлиш яхши натижалар беради.

Беданаларни узоқ вақт қуёш нурида сақлаш мумкин эмас. Офтоб нури таъсирида беданалар нотинчланиб безовта бўла бошлайди. Уларни шовқинли жойларда сақлаш тавсия этилмайди. Санитария нормаларига кўра, бедана боқишда биноларни аҳоли яшаш жойидан 300 метрдан кам бўлмаган масофада жойлаштириш тавсия этилади.



Истеъмол тухуми олиш учун улар қафасларга 1 м² майдончага 100-120 бош ҳисобидан жойлаштирилади. Агар беданалардан насл олмоқчи бўлсангиз беданалар зичлиги камайтирилади. Улардан тухум олиш учун 15x15 мм катталиқдаги сим катак полларда сақлаш мақсадга мувофиқдир. Кенг вольерларда паррандалар декоратив мақсадда сақланади.


Беданалардан насли ва истеъмол тухуми олиш мақсадида уларни боқишнинг турли вариантлари тавсия этилади:

а) Бир катакда 3-5 бош макиён беданага 1 хўроз бедана сақланади. Ёруғлик режими бир кунда 18 соат. Хона ҳарорати +17-25 °C бўлади. Катак баландлиги 15-17 см (“Япон” зоти учун), бундан баланд катакларда парранда чўчиб кетган пайтлари учишга ҳаракат қилиб ўзини жароҳатлаши мумкин. Катак полининг ўлчами 50×25 см ни ташкил этади.

б) Ёш, 20-30 кунлик бедана макиёни полининг ўлчами 15×15 см, 5 қаватли уя катакчалари мавжуд бўлган катакларга жойлаштирилади. Бундай шароитда бедана макиёни ҳар 16-24 соатда тухум беради ва маҳсулдорлик даври узаяди.

в) Бедана макиёнлари 30-50 бош паррандага мўлжалланган катакларда сақланади. Катак полининг ўлчами 60×60 см бўлади. Олд томонининг баландлиги – 13 см, орқа томони – 11 см. Эшик катакнинг юқори қисмида жойлашади. Катакнинг олд томонидан полнинг симли тўри ташқарига чиқиб туради ва тухумларнинг йиғилиши учун учи тепага қайрилган бўлади. Полнинг қиялиги (7-12°) тухум думалаши учун мўлжалланган.


Хонаки кичик бедана фермаси – стол устида турадиган варианты



34 бошга мўлжалланган бир ярусли катак, ўлчами – 99×38×18 см (узунлиги, эни тухум йиғувчисиз, баландлиги). Катак емдон, ниппелли сувдон, сув идиш, гўнг учун тагликлар билан жиҳозланган.



Уч ярусли каток, ўлчами – 64x48x25 см (узунлиги, эни тухум йиғувчисиз, баландлиги). Каток емдон, ниппелли сувдон, сув идиш, гўнг учун тагликлар билан жиҳозланган, шу билан бирга 2 та лампалар, иссиқликни бошқариб турувчи асбоб (диммер) билан жиҳозланган рефлектор-иситкич таъминланган



Беданаларни боқиш учун мўлжалланган универсал каток – брудер (кўп секцияли, 4 ярусли)

Беданаларни тўлиқ цикл бўйича боқишга мўлжалланган универсал катак батарея. Катак батареяни юқори ярусда 10 кунлик бўлган 80-100 бош бедана жўжаларини парваришlash учун брудер, ёруғлик – иситкич тизими ўрнатилган. Кейинги 2 яруслар брудер тагида 11 кунлигидан 30 кунлигигача бўлган бедана жўжаларини парваришlashга мўлжалланган. Ҳар бир катакда 50 бошдан, жами икки ярусда 100 бош бедана боқиш мумкин. Пастки уч ярусларда беданаларни 31 кунлигидан 45 кунлигигача бўлган давр ичида боқишга мўлжалланган. Бундан ташқари, катакларда беданаларни 60 кунликкача бўлган давр ичида бўрдоқига ҳам боқиш мумкин. Ярусларни ҳар бирида 40 бошдан, жами 3 та ярусда 120 бош беданани бўрдоқига боқиш имкони бўлади.

Турли ёшдаги паррандани бир вақтнинг ўзида ушбу катак батареяда 320 бошгача боқиш мумкин.

Секция ўлчами эни, узунлиги, баландлиги (сув идишни ҳисобга олганда) – 104x176x40 см. Ниппелли ичиш тизими ва рух билан қопланган тунукадан қилинган гўнг йиғиш таглиги ёки поликарбонатдан қилинган таглик, катакларда – ён ва орқа деворлар очик, брудернинг ён ва орқа деворлари рух билан қопланган металл тунукадан, каркаси пайвандланган металл мебель гилдиракларидан иборат.



Беданаларни ҳафтада бир марта, ювилган йирик ҳажмли қумда чўмилтириш уларни зараркунанда (эктопаразит) лардан тозалашда яхши самара беради. Паррандалар иштиёқ билан чўмилишади. Катакка баландлиги 8 см келадиган идиш ичида 4 см қалинликдаги қум қўйилади. Бир қисми қум ва бир қисми дарахт қипиғи чириндиси аралашмалари бўлиши мақсадга мувофиқдир.

Беданалар боқилаётган хонанинг нисбий намлиги 60-70 фоизни ташкил этиши керак. Агар беданалар патларини ҳурпайтириб, ҳансираб, тумшуғини очиб нафас олса, тухум бериши камайса, билингки, ҳаво таркибидаги нисбий намлик камайиб кетган. Бундай ҳолатларда катак олдига бир идишда ёки челақда сув қўйиш яхши натижа беради. Хона полини тез-тез ювиб туриш ҳам хонанинг ҳаво нисбий намлигини кўтаради. Аммо беданаларни доимий нам жойларда сақлаш ва боқиш тавсия этилмайди.



Бедана учун бир кунда 17-18 соатлик ёруғлик бериш энг қулай шароит ҳисобланади. 24 соатлик ёруғлик берилганда беданалар кўпроқ тухум беради, лекин маҳсулдорлиги қисқа вақт ичида камайиб кетади. Хонани кучли ёритиш тавсия этилмайди, чунки кам ёруғликда ҳам беданалар яхши кўриш қобилиятига эга, ўзларини хотиржам тутадилар. Катакда боқилаётган беданалар қуёш нурида бир-бирларини ва тухумларини чўқиб ташлайдилар. Бедана боқилаётган ўлчами 4x4 метр бўлган хонага қуввати 40 ватт бўлган бир дона оддий лампочка етарли бўлади. Ёруғликни ёқишнинг энг қулай вақти эрта тонг соат 6:00 да ва ўчириш вақти кечқурун соат 23:00 да ҳисобланади.

Бир кунлик ёруғлик вақтини узайтирсак, озуқа истеъмоли кўпаяди ва парранда тез қарий бошлайди. Бир кунлик ёруғлик вақти қисқартирилса, тухум бериш маҳсулдорлиги камаяди ва парранда кечаси билан оч қолади.

Ёруғлик ва қоронғиликни кетма-кетлик билан қўллаш яхши натижа беради. Масалан: 1 соат ёруғлик ва 2 соат қоронғилик беданаларнинг ўсиши, ривожланиши ва маҳсулдорлигига ижобий таъсир кўрсатади, яъни ёруғликда парранда бир маромда озиқланади ва қоронғиликда уни ҳазм қилади.

Беданалар турадиган катакларни 3 ойда бир марта яхшилаб тозалаб, ювиш керак бўлади. Бунинг учун паррандани бошқа жойга вақтинча ўтказиб, катакларни яхшилаб тозалаб, кир ювиш кукуни қўшилган иссиқ сувда чўтка билан ишқалаб ювилади ва қурилади. Бедана гўнгидан чиқаётган буғ инсон ва бедана учун зарарли ҳисобланади, шунинг учун гўнгни тез-тез тозалаб туриш лозим.

Паррандалар нўхат билан боқилганда, улар иштаҳа билан истеъмол қилишади. Гўнгидан кўп миқдорда буғ ажралиб чиқади. Лекин бедана учун нўхат жуда фойдали озуқа бўлгани сабабли уни бериб туриш тавсия этилади.

БЕДАННИ ОЗИҚЛАНТИРИШ

“Япон” беданалари бошқа зотлардан кўп тухум бериши билан ажралиб туради, уларнинг тухумлари такрорланмас, ўзига хос ажойиб таркибга эга. Улар фақат катакларда сақланиши сабабли уларда керакли бўлган қўшимча озуқани топиб истеъмол қилиш имкони йўқ. Шунинг учун беданаларга керакли моддаларга бой бўлган озуқалар бериш лозим бўлади. Тухум ва гўшт йўналишидаги беданаларнинг озуқа таркиби асосан оқсил, дон, витаминлардан иборат, уларга яна чиғаноқ, майда тош ва сув ҳам бериб туриш зарур. Юқорида

кўрсатилган озуқалар таркибида етишмовчилик бўлса, унда бедана маҳсулдорлигига (тухум бериши) ва соғлиғига салбий таъсир этади.



Беданалар бир кунда 3 ёки 4 марта куннинг ёруғ пайтида бир хил вақтда озиқлантирилади. Вояга етган урғочи беданалар озуқаси таркибида 21-25 фоиз хом протеин бўлиши шарт. Озуқа таркибида протеин моддасининг кам ёки кўплиги тухумнинг сифатига, ҳажмига ва сонига жуда тез таъсир кўрсатади. Озуқа таркибида протеин кам бўлганида беданалар тухум беришни камайтиради, тухумлар майда бўлади ва чўқиб ташлаш ҳоллари кўпаяди. Озуқа таркибида протеин кўп бўлганда инкубация учун яроқсиз бўлган сариғи иккиталик тухумлар сони кўпаяди. Оддий парранда озуқаси таркибида протеин моддаси кам бўлади, шунинг учун, масалан парранда емига бир кунга ҳар бир бошга 2 граммдан протеинга бой озуқа (творог, балиқ, қийма ёки бошқа) қўшимчалари қўшилади. Тухум бериши камайган, қариб қолган унинг макиёнлари рационадаги протеин миқдорини камайтириш керак бўлади. Уйда боқиладиган тухум

берувчи беданаларнинг протеинга бўлган талаби оддий ёввойи беданаларга нисбатан кўпроқ бўлади. Озуқанинг кўп миқдори (40%), айниқса, донлар кечаси берилади. Донли озуқаларни парранда секин ҳазм қилиши сабабли, айниқса кечаси донли озуқалар берилганда паррандалар эрталабгача ўзини тўқ тутади.



Товуқ озуқаси бедана учун энг яхши озуқа ҳисобланади, фақат озуқа таркибидаги хом протеин моддасини 21-23,5 фоизгача кўтариш керак бўлади. Озуқа нам аралашма ҳолатида берилганда беданалар сувга чанқоқликни ҳис этишмайди. Бир кунда битта бедана 22-27 грамм озуқа истеъмол қилади. 1 кг тухум массасини олиш учун 5-7 кг ем-озуқа сарфланади. Бир йилда бир бош бедана макиёни 9 кг атрофида ем-озуқа истеъмол қилади. Ёруғлик вақтининг узайиши, хона ҳароратининг пасайиши, озуқа рационининг нотўғри тузилиши ва бошқа беданаларни безовта қиладиган ҳолатларда озуқа-ем сарфи кўпайиши мумкин.

Табиий ҳолатларда беданалар ўтлар ва донлар билан озиқланади, ёш жўжалар ҳашарот ва қуртларни ҳам истеъмол қилишади. Бедананинг ёш жўжалари кўпроқ ҳар хил ҳашарот, қурт-қумурсқаларни истеъмол қилишни хуш кўради. Японияда беданаларни 50 фоиз гуруч ва 50 фоиз балиқ билан боқишади. Бундай озуқани улар иштаҳа билан истеъмол қилади. Бизнинг шароитда бундай озуқа таннархи қимматга тушишини эътиборга олиб қўлланилмайди.

■ I ДОНЛИ ОЗУҚАЛАР

Уй шароитида ҳамма майдаланган донлар яхши озуқа ҳисобланади. Дон аралашмасига буғдой, маккажўхори, сули ва арпалар киради. Сайроқи беданалар модасига бир кунда 5-7 грамм дон аралашмаси кифоя қилади. Ҳамма беданаларга дон кепакларини бериш фойдалидир. Айниқса, нўхат, соя ва шунга ўхшаш бошқа дуккакли ўсимлик донларини майдалаб ёки димлаб бериш ўта фойдали ҳисобланади.



■ I ТАБИЙ ҲСИМЛИКЛАР

Қайнатилган картошка ва унинг қобиғи, қирғичдан ўтказилган сабзини бериб туриш ўта фойдалидир. Сабзининг ўрнига вақтинча шолғом ва лавлаги бериш ҳам мумкин. Беданалар қайнатилган ва қирғичдан ўтказилган лавлагининг барча турини иштаҳа билан истеъмол қилади. Қиш даврида, яъни кўкатлар бўлмаганда, улар сабзини катта миқдорда истеъмол қилиши мумкин, шу сабабли қишга сабзи захирасини яратиш тавсия этилади. Бундан ташқари, ҳар куни майдалаб кесилган кўкатлар берилади ёки уни қирғичдан ўтказилган сабзи билан алмаштириш мумкин. Кўкатлардан карам барги, лавлаги, сабзи, беда, қичитқи ўт, қоқийўт, кўк пиёз ва бошқаларни бериш мумкин. Беданага яна қирғичдан ўтказилган олма, қовоқ ва кам тузланган карам баргларини бериш мумкин. Беда уни у ҳам жуда фойдали ҳисобланади.

■ I ПРОТЕИН

Бундан ташқари, бедана организми оқсилга бой озуқаларни ҳам талаб этади. Балиқ ва гўшт-суяк унлари, балиқ чиқиндилари, хом ёки қайнатилган балиқ ва гўшт қиймаси, творог, қуруқ сут, ер чувалчанги, ун қурти, сўйилган парранданинг қони, чумоли личинкалари, ҳархил премикслар ва бошқа протеин қўшимчалари шуларга киради. Шу билан бирга оқсилга бой кунжара ва шротлар, майдаланган писта ва ловия, қайнатилган нўхат ва бошқалар ҳам тавсия этилади.

Улар ҳайвон оқсилига бой озуқаларни хуш кўради, лекин етарли миқдорда соя, беда уни ва маккажўхори билан боқилганда, бунга эҳтиёж сезмайди. Ҳайвон оқсили билан бойитилган омухта ем бир кунда 2 маҳал берилади. Балиқнинг суяк чиқиндиларини беданага беришда эҳтиёт бўлиш керак бўлади.

■ | МИНЕРАЛ МОДДАЛАР ВА МАЙДА ТОШЛАР

Улар рационда минерал моддалар бўлиши ўта муҳимдир. Минерал моддаларнинг асосий манбаи майдаланган денгиз ёки чучук сув чиғаноғи ҳисобланади. Рационда майда тошларнинг бўлиши ҳам жуда зарур. Минерал моддалар таркибига кирувчи кальций тухум қобиғининг шаклланишида катта аҳамиятга эга. Чиғаноқнинг ўрнига вақтинча бўр, тухум қобиғи, озуқа оҳағи ҳам қўлланса бўлади. Майда тошлар етишмаса, беданалар чўмилиш учун идишларда қўйилган қумни чўқий бошлайди, агар қум таркибида зарарли моддалар бўлмаса, унинг зарари йўқ. Майда тошлар билан қум зарралари парранданинг мускулли ошқозонида озуқани ишқалаб майдалайди, натижада озуқа таркибидаги тўйимли моддаларни ўзлаштириш яхшиланади. Тошни паррандага беришдан олдин яхшилаб сувда ювиш лозим.

■ I СУВ

Катакда бедана учун ичимлик суви доимо бўлиши керак. Беданалар ўз оғиз ва томоқларини сувда чайишни ёқтирадилар, бу эса сувнинг тез ифлосланишига олиб келади. Шунинг учун ҳар куни 1-2 марта сувдонларни ювиш тавсия этилади. Вақти-вақти билан ичак-ошқозон касалликларининг олдини олиш учун марганцовка оч қизил ранг қилиб сувга эритиб берилади



■ I ОЗУҚА ҚЎШИМЧАЛАРИ ВА ВИТАМИНЛАР

Озуқа қўшимчаларига витамин қўшимчалари, витамин-минералли премикслар, углеводородлар, ферментлар ва озуқа хамиртуруши киради. Озуқа қўшимчалари беданага қатъий бир меъёрда берилади. Бироз вақт туриб қолган премикс ва озуқа қўшимчаларини сифатини текширтириб туриш керак бўлади.

Беданаларнинг витамин (дармондори)ларга бўлган талаби, гр.

№	Витаминлар номи	6 ҳафтагача ёшда	Бўрдоқига боқиш
1	A	15,0	15,0
2	D ₃	1,5	1,5
3	E	20,0	20,0
4	K	2	2
5	B ₁	2	2
6	B ₂	5	5
7	B ₃	20	20
8	B ₄	1000	1000
9	B ₅	60	60
10	B ₆	4	4
11	Bc	1,5	1,5
12	B ₁₂	0,025	0,025
13	H	0,2	0,2
14	C	50	50

Беданага озуқа ўрнида тўтиқушларнинг озуқасини ҳам ишлатса бўлади, фақат қўшимча равишда 12 грамм протеин (балиқ ёки балиқ уни, гўшт қиймаси ва бошқалар), кўкатлар ва чиғаноқлар (иссиқ сувда ювилган ва майдаланган) қўшиш талаб этилади.

Балиқ қиймаси, ёмғир чувалчанги, творог, гуруч, пиширилган ва майдаланган нўхат, қирғичдан ўтказилган сабзиларни беданалар иштаҳа билан истеъмол қилишади.

Қишда кўкатлардан салат ҳамда кўк пиёз ва ундирилган тарик бериш организмнинг витаминларга бўлган талабининг маълум қисмини қондиради. Ундирилган дон таркибидаги крахмал шакар кўринишига ўтади ва витаминларга бой бўлади, таъм сифати яхшиланади.

Емдонлар рухланган тунука ёки бошқа шунга ўхшаш материаллардан ясалди. Емдонларнинг чуқурлиги 5-7 см, баландлиги 15 см бўлади. Улар озикланиш вақтида емларни сочиб ташлайди, шунинг учун емдонларнинг таги чуқур қилинади, четлари ичкарига қайрилган бўлади ва сувдонлардан узоқроқ ўрнатилади. Емдонларни 2/3 қисми ем билан тўлдирилади. Бир бош вояга етган бедана учун озикланиш фронти 3-5 см ни ташкил этади. Емдонлар ифлосланишига қараб вақти-вақти билан тозалаб турилади.

Беданалар учун сувдонларнинг ҳар қандай конструкциялари ҳам тўғри келаверади. Энг қулайи вакуумли сувдонлар ҳисобланади. Лекин улар ифлосланиши сабабли, уни тез-тез ювиб, тозалаб туриш ноқулай бўлгани учун бироз қийинчиликлар туғдиради.

Ёш беданаларга кичик ликопча ёки консерва банкасини ишлатиш тавсия этилади, чунки уларни ювиш, қайнатиб стерилизация қилиш қулайдир. Беданаларни кўп миқдорда боқиш учун ниппелли ёки оқиб турувчи сувдонларни қўллаш мақсадга мувофиқ бўлади.

Махсус озуқа бўлмаган вақтларда, беданаларни ҳар хил витамин ва оксил моддалари қўшилган дон қоришмалари билан боқиш мумкин. Аста-секинлик билан маҳсулдорликни максимал даражага етказиш мақсадида рацион таркиби ўзгартирилиб борилади. Масалан, қуйидаги таркибдаги озуқаларни бериш мумкин:

- эр талаб – тариқ, пиширилган балиқ, майдаланган кўкатлар;
- тушда – буғдой кепаги, майдаланган дон қоришмаси, қирғичдан ўтказилган сабзи;
- кечқурун – тариқ, буғдой, макка дони, пиширилган балиқ, майдаланган кўкатлар.

Изоҳ: емдонда доим майдаланган чиганоқ бўлиши шарт.

■ I БЕДНАЛАРНИ КЎПАЙТИРИШ

Наслчиликда беданаларнинг макиёнлари 3 ойликдан 8 ойликкача бўлганлари ва нарлари 3 ойликдан 6 ойликкача бўлганлари танланади. Турли насли ва яқин қондошларини ўзаро чатиштириш тавсия қилинмайди.



Инкубацион тухум олиш учун 1 та нарга 2-4 кўпи билан 5 та макиён тўғри келиши керак. Беданаларининг макиёнлари нарларига шунчалик кўникиб қолишадики, макиёнлар янги қўйилган нарларни қабул қилмайди. Бундай вақтларда нарлар бошқа катакларга ажратиб қўйилади ва 2-3 кундан кейин яна шу катакка қўйилади. Нарлар алмашганда тухум қўйиш пасайиши мумкин, лекин бир ҳафта ичида яна тикланади.

Беданаларнинг жуфтлашиш даврида рацион таркибидаги протеин ва витаминли қўшимчалар миқдорини

бирмунча кўпайтириш тавсия этилади. Буғдой кепаги уларга фойдали ҳисобланади. Макиёнлар ичига нарлар кўйилганидан бир ҳафтадан кейин очириш учун инкубацион тухумларни инкубаторларга териш мумкин бўлади.

Қисқа вақт жуфтлаштириш йўли билан инкубацион тухум олиш учун эрталаб макиён ёнига нарни 15-20 дақиқага ҳар 2-3 кунда бир марта қўйилади.

Беданаларининг жинсини 20 кунликдан патининг рангига қараб ажратиш мумкин. Бедана нарларининг бўйни ва кўкраги тўқ жигаррангда бўлади. Макиёнларининг бўйин ва кўкраклари оч жигаррангда бўлиб, йирик қора нуқталари мавжуд. Айрим беданаларнинг рангидан жинсини ажратиб олиш имкони бўлмаса, наслга қолдирилмайди.

Уларнинг бошқа зотларини ташқи кўринишидан ажратиш қийинчилик туғдиради, шунинг учун уларнинг жинсини клоакасидан билиш мумкин: нарининг клоакасининг (орқа чиқарув тешиги) атрофи қизғиш рангда, макиёнини клоакаси атрофи кўкимтир-жигаррангда бўлади. Шу билан бирга хўрозини макиёнидан тирик вазнига қараб ҳам ажратиш мумкин: макиёни хўрозидан 15 фоизга оғирроқ бўлади. Эркагининг бўйни ва танаси урғочисиникидан узун бўлади. Ёш нар баланд овозда қичқириши билан макиёнлардан ажралиб туради.

Калифорния беданасининг нари кўзининг устки қисмида оқ чизик борлиги (1,5 ойликда пайдо бўлади) билан ажралиб туради. Оқ инглиз зотининг нарлари бошида қора доғлари бўлади. Умуман ҳамма бедана зотлари нарларининг кўриниши макиёнларига қараганда башангроқ бўлади.

Беданаларнинг “Япон” зотини ёшини аниқлаш бирмунча қийин. Ёш беданалар патларининг ранги очроқ бўлади, ёши катталарининг ранги тўқроқ бўлади. Катта ёшдаги

беданаларнинг патлари тепа томонидан тўкилган бўлади.

2 ойлик беданаларнинг гўшти жуда мазали бўлади. Ёши катта беданалар гўшти таначаларининг ранги тўқроқ, териси тез йиртилувчан, уларнинг гўшти кўпроқ қайнатилади.

■ I ИНКУБАЦИЯ

Инкубация учун ўрта йирикликдаги тухумлар танлаб олинади. Бедананинг “Япон”, “Мармар ранг” ва “Эстон” зотлари учун инкубацион тухум вазни 9-12 граммни, “Фараон” зоти учун 12-18 граммни ташкил этади.

Инкубацияга қўйишдан олдин тухумлар ҳарорати +10-12 °C ва нисбий намлиги 70-75 фоиз бўлган хонада 3 кун сақланиши лозим.

Бедана тухумларининг инкубация даври ўртача 17 кунни ташкил қилади (сайроқилар – 16 кун, Калифорния зоти – 22 кун, Виржиния зоти – 23 кун).




■ I ЁШ БЕДАНАЛАРНИ ЎСТИРИШ

Бедана жўжалари тухумдан ўзлари чиқади. Жўжаларнинг ҳажми тухум ҳажмидан катта бўлади, чунки улар тухум ичида думалоқ ҳолда зич жойлашган бўлади, оғирлиги 6-8 граммни ташкил этади. Шундан кейин жўжалар коробкаларга аста жойланиб, қуригунча электр иситкич билан иситилади.

Беданани боқишда эътиборни қаратиш керак бўлган асосий шартлардан бири хона ҳарорати ва бедана жўжалари мавжуд бўлган қути-катак ичидаги ҳароратдир.

Бедана жўжалари ёши (кун)	Ҳарорат (°C)	
	Хонада	Бедана жўжалари жойлашган қути- катакда
1-10	28-27	38-35
11	27	37-35
12	27	36-34
13	27	35-34
14	26	34-33
15	26	33-32
16	26	32-31
17	25	31-30
18-21	24	29-28
22-24	23	27-26
25 ва ундан юқори	22	25



Биринчи 10 кунликда бедана жўжалари жойлашган қути-катакда ҳарорат $+35-38^{\circ}\text{C}$, хонада ҳарорат $+27-28^{\circ}\text{C}$ бўлиши керак. 10 кунликдан 17 кунликкача аста-секинлик билан ҳароратни пасайтириб борилади, қутида ёки қути-катакда $+30^{\circ}\text{C}$ гача, хонада $+25^{\circ}\text{C}$ гача. Ёш беданалар 17-кунидан 25-кунигача яшик-катакда $+25^{\circ}\text{C}$ гача, хонада $+22^{\circ}\text{C}$ гача бўлган ҳароратда сақланади.

Ёш беданалар боқилаётган хона ҳавоси қуруқ бўлмаслиги керак, акс ҳолда қути-катак ёнига суви билан челак ёки тоғора қўйилади.

Қуйида 20 бош ёш беданаларга мўлжалланган қути-катакни кўриб чиқамиз: Унинг деворлари тахтадан ясалган (25 мм), поли 10x10 мм ўлчамдаги сим тўрдан иборат. Қути-катакнинг ўлчами 75x30x20 см ни ташкил этади.

Биринчи 3-4 кунлик бедана жўжалари жойлашган қути-катак полининг катакларини брезент ёки қоп материали билан ёпиш керак бўлади. Бу материалларни ювиб яна кўп марта қайта ишлатиш мумкин. Жўжаларнинг оёқлари

тетиклашгандан кейин полга қалин қоғоз солиш ёки газета солиш ҳам мумкин. Полга материал ёки қоғоз солинган бўлса ҳар доим сим тўрга нисбатан иссиқ бўлади. Жўжалар кириб қолиб нобуд бўлмаслиги учун полга тўшама солинаётганда четлари букланиб қолмаслиги керак. Ифлос бўлган полдаги тўшамани ҳар куни алмаштириш зарур. Жўжалар юрганида оёқлари сирпанчиқ полда сирпаниб чиқиб кетиб, оёғи қийшайиб қолмаслиги учун тез-тез кўздан кечириб туриш керак бўлади.

Иссиқ хоналарда бедана жўжаларини полда ҳам ўстириш мумкин. Бунинг учун полга 20 мм қалинликдаги похол ёки тахта қипиғи солиниб, сочилган ем ва парранда гўнги билан ифлослангани сари устига янгиси солиб турилади.

Беданаларнинг биринчи ҳафтасида чуқурлиги 2 см дан ошмаган емдонлар ишлатилади. Емдонларни юмшоқ материаллар билан қоплаш жўжа тумшуғи шикастланишининг олдини олади. Бундан ташқари, емдоннинг устини йирик катакли сетка билан қоплаш емларнинг ерга сочилиб кетишининг олдини олади.

Бедана жўжалари учун энг қулай сувдон 5 мм дан чуқур бўлмаган Петри чашкаси ҳисобланади. Сотувдаги сайроқи қушлар учун мўлжалланган вакуумли сувдонларни ҳам ишлатса бўлади. Оддий автосувдонларда бедана жўжалари чўкиб ўлиши мумкин.

Ёш беданаларни ўстириш шароитлари

Номи	Ёши (кун)			
	1-9	10-15	16-21	22-30
Катакдаги ҳарорат (°C)	35-36	30-32	25-27	22-25
Хонадаги ҳарорат (°C)	27-28	25-26	23-25	20-22
1 бошга талаб этиладиган озуқа (г/кун)	4	7	13	15
Ёруғлик даври (соат/кун)	24	24	22-20	20-17
Тирик вазни, г.	6-20	—	20-60	—

■ I ЎСТИРИШ ХУСУСИЯТЛАРИ

Бедана жўжаларининг олдида сув ва ем доимо бўлиши керак. Хонадаги юқори ҳарорат таъсирида ем ва сув айнийди, натижада ёш беданалар заҳарланиши мумкин. Вакуум сувдондаги сувлар бир кунда икки маҳал алмаштирилади, сувдонлар яхшилаб ювилади. Бедана жўжаларига ичимлик сувини қайнатиб, совутилган ҳолда бериш тавсия этилади.

Бедана ўстиришда энг асосий талаблардан яна бири, бу ёруғликка эътибор бериш тартибидир. Хонани жуда ёруғ қилиб юбориш беданаларнинг ўзаро бир-бирини чўқиш ҳолларига олиб келади. Ёруғлиги 100 люксдан юқори бўлган ёруғ хоналарда ўстирилган макиён беданалар оқибатда майда тухум қила бошлайди. Беданаларнинг

“Япон” зоти биринчи 2 ҳафтада кунига 24 соат ёруғликда боқилади. Кейин аста-секинлик билан кунига 17 соат бўлгунича ёруғлик 2 соатдан камайтириб борилади.

Беданалар 3 ҳафталигида катта беданалар катакларига ўтказилади. Катта ёшда бошқа катакка ўтказиш макиёнларнинг тухумга киришини 2 ҳафтага кечиктириб юборади. Яратилган шароитларда ўстирилган беданаларнинг “Япон” зоти сақланиш кўрсаткичлари 98 фоизни ташкил этади. Бу бошқа парранда турларидан анча юқоридир.

I ЁШ БЕДАНАЛАРНИ ОЗИҚЛАНТИРИШ

Беданаларни озиқлантиришнинг бир неча вариантлари мавжуд. Лекин ҳаммасида ҳам сув бир хил берилади. Биринчи кундан бошлаб сувдонларга ним қизил марганцовкали сув солинади. Сувдонларнинг чуқурлиги 5 мм дан кўп бўлиши мумкин эмас, акс ҳолда жўжалар сувда чўкиб, ўлади. Бу даврда шиша банканинг пластмасс қопқоғи ёки Петри чашкаси қулай ҳисобланади. Хом сув иссиқ ҳароратда тез айнишини инobatга олсак, қайнатилган сув бериш маъқул бўлади. Бир неча кундан кейин яна марганцовка эритмаси бериш мақсадга мувофиқ. Марганцовка эритмасини вояга етган паррандага ҳам вақти-вақти билан сувга қўшиб бериш тавсия этилади.

Биринчи 3 ҳафтада паррандага озуқа чекланмайди. Ортиқчаси 2 соатдан кейин олиб ташланади. Ем ҳарорати яшикдаги ҳароратга яқин бўлиши керак.

■ | ОЗИҚЛАНТИРИШ ТУРЛАРИ

а) Бедана жўжалари биринчи 2 кунлигидан бошлаб яхшилаб қайнатиб пиширилган ва қирғичдан ўтказилган тухум билан боқилади. Бунга яна майда тарик ва сули ёрмасини (тухум ҳажмидан $\frac{1}{4}$ ташкил этади), простокваша, қуюқ қилиб пиширилган бўтқалар қўшилади. Озуқага бедана тухуми қобиғи билан бирга ишлатилади, товуқ тухуми қобиқсиз ишлатилади. Битта бедана тухуми билан 10 та бедана жўжасини тўйдириш мумкин.

б) Бир кунлик бедана жўжаларини қуйидаги ем қоришмаси билан озиқлантириш мумкин: кепак, тухум сариғи ёки чумоли куколкаси, майдаланган янги узилган кўкатлар ва қирғичдан ўтказилган сабзи. Озуқа қоришмаси 3х3 мм тешикчалари бўлган сеткадан ишқалаб ўтказилади.



в) Қувватсизланган беданалар қуйидаги схема бўйича озиқлантирилади:

Биринчи кун яхшилаб қайнатилиб пиширилган бедана ёки товуқ тухуми қирғичдан ўтказилиб берилади.

Иккинчи кун тухумга 1 бош бедана жўжаси учун 2 г ҳисобида творог қўшилади.

Учинчи кун рационга янги ўрилган ва майдаланган кўкатлар қўшилади.



Тўртинчи кун пиширилган тухумнинг миқдори камайтирилади ва творог миқдори кўпайтирилади.

Бундан кейин бедана жўжаларига тариқ, тариқ ёрмаси, майда ун қуртлари, яхши пиширилиб қирғичдан ўтказилган тухум, майдаланган кўкатлар берилади. Ёки пиширилган тухум, тариқ, тариқ майда ёрмаси ва сувда қайнатиб пиширилган балиқ, уларнинг устидан майда қирқилган қичитқийўт, қоқиўт, жағ-жағ ва бошқа кўк ўтлар берилади. Бир кунда ерни қоришмаси 6 маҳал берилади. *Тўртинчи*

кундан бошлаб рациондаги тухум миқдори аста-секинлик билан камайтиради, омухта ем миқдори эса кўпайтириб борилади. Бедана жўжалари рационига бройлер жўжалари учун мўлжалланган омухта емни ҳам қўшиш мумкин.

г) Бедана жўжалари биринчи 10 кунликда омухта ем қоришмаси билан боқилади. Яхшилаб қайнатиб пиширилган тухум, сут ва простокваша (қатик) берилади. Қоришма 3х3 мм бўлган сеткадан ишқалаб ўтказилади. 3-кундан бошлаб бу қоришмага балиқ мойи, творог, хамиртуруш, майдаланган қичитқи ўти ва қирғичдан ўтказилган сабзи қўшилади.

д) Бедананинг Виржиния (АҚШ) зотиغا биринчи кундан бошлаб тухумнинг сариғи майдалаб тарик билан бирга аралаштириб берилади, яна майда қирқилган кўкатлар ва қирғичдан ўтказилган сабзи ҳам берилади. 3-4 кундан қоришмага омухта ем ва яна тарик қўшилади. 10-кундан бошлаб рационга дон ёрмалари қўшилади.

Беданалар учун 8 кундан 29 кунгача энг яхши сифатли омухта ем озуқа қуйидагилардан иборат ҳисобланади: майдаланган макка ва буғдой дони; протеинли, витаминли ва минералли қўшимчалар.



Беданаларга бериладиган рацион наъмунаси

Т/р	Компонентлар	Ёш бедана		Вояга етган бедана
		1-4 ҳафта	5-6 ҳафта	
1	Маккажўхори дони	40	43	41
2	Бугдой дони	8	25	16
3	Бугдой кепаги	—	5	—
4	Кунгабоқар шроти	—	10	20
5	Соя шроти	35	—	—
6	Балиқ уни	5	5	5
7	Гўшт-суяк уни	3	3	4
8	Озуқабоп хамиртуруш	2	3	4
9	Қуруқ сут (обрат)	3	—	—
10	Ўт уни	1	4,5	2
11	Бўр, чиғаноқ	1	1	6
12	Премикс	1	1	1
13	Ош тузи	0,4	0,5	0,5
	Жами	100	100	100
100 грамм омухта ем таркиби:				
Энергия алмашинуви, кДж		1216	1156	1197
Энергия алмашинуви, ккал		298	276	285
Хом протеин, %		28	17,3	20,94
Клетчатка %		4	5,1	5,2
Кальций, %		1,01	1,12	2,844
Фосфор, %		0,91	0,87	0,913
Натрий, %		0,4	0,4	0,402

Беданаларга иккинчи ҳафтадан майда тош ва майдаланган чиғаноқлар берилади. 29 кунликкача бўлган бедана еми таркибида творог ва пиширилган, майдаланган балиқ ҳисобига протеин миқдори юқори бўлади. 30 кундан 42 кунгача ёш беданаларни вояга етган беданалар рационига ўргатиш керак бўлади. Беданаларни жинси ўз вақтидан илгари ривожланишининг олдини олиш мақсадида еми таркибидаги протеин миқдори 16-18% гача туширилади, чунки у кейинчалик тухум маҳсулдорлигига салбий таъсир кўрсатади.

Биринчи ҳафта бедана жўжаларига бир кунда 5-6 маҳал еми берилади, кейин 4 маҳалга туширилади ва тўртинчи ҳафтадан 3 маҳал берилади. 3 ҳафталик ёш беданалар кумни озуқа деб қабул қилади, натижада заҳарланиш ҳоллари кузатилиши мумкин. Лекин 2 ҳафталик беданачалар тез ва яхши ўсади, кумда чўмилишни хоҳлаб, ерларни ковлаб, титиб ташлайди. Шунинг учун қорни тўқ беданаларга чўмилиш учун идишда кум қўйилади ва назорат қилинади.

ГЎШТГА СЕМИРТИРИШ

“Япон” беданаларининг ортиқча хўрозлари ва тухум беришга яроқсиз макиёнларини алоҳида ажратиб, гўштга боқишга қўйилади.

Гўштга боқишда нар ва макиёнлар бир-бирларидан алоҳида сақланади. Парранда яхши иситиладиган, паст ёруғликда, хона ҳарорати +20-24 °C бўлган жойда боқилади. Хона ёруғлиги кам бўлса беданалар кам ҳаракат қилади, кам энергия сарф қилади ва вазни тез ошади. Ёруғ кун вақти 10-12 соатгача камайтирилади. Беданалар кунига 3-4 марта озиқлантирилади. Беданалар гўштга бир ой мобайнида

боқилади. Улар ҳар куни 3-4 маҳал озиқлантирилади. Паррандага ҳар хил донлардан таркиб топган омухта ем берилади. Бу даврда беданаларга тарик ва макка дони бериш тавсия этилади. Бройлерларга мўлжалланган омухта емга 30 дақиқа сувда қайнатилган нўхатни емига қўшиб бериш мақсадга мувофиқ бўлади. Озуқанинг калориясини ошириш учун таркибига 5 фоиз озуқа ёғи қўшилади.

Ѓўштга боқиш тартибига аста-секинлик билан ўтказилади. Бедана ғўштига яхши кўриниш бериш учун қирғичдан ўтказилган сабзи ҳам берилади. Бу даврда бедана ғўштига ёқимсиз маза ва ҳид бериши сабабли пиширилган балиқ, балиқ уни, балиқ ёғи, кўк пиёз ва саримсоқ пиёзлар бериш тавсия этилмайди. Сўйишдан олдин бедананинг ичимлик сувига озгина миқдорда туз қўшиб берилади.

■ | БЕДАННИ СЃЙИШ

Тухум ва ғўшт йўналишидаги беданаларни одатда ғўшт учун сўйиш ҳам мумкин. Беданаларни эрталаб озуқа беришдан олдин, жиғилдони бўш вақтида сўйиш тавсия этилади. Беданаларни катта қайчи, ток қайчи ёки пичоқ ёрдамида сўйиш қулайдир.



Сўйилган парранда бир неча дақиқага қони яхшилаб оқиб кетиши учун оёғидан осиб қўйилади. Кейин қайчи билан аста терига жароҳат бермасдан қанотлари кесилади ва патлари юлиб ташланади. Патлар ўсиб чиққан йўналиши бўйича юлинади, акс ҳолда териси йиртилиб кетиши мумкин. Одатда, бедана патлари енгил юлинади, айрим ҳолларда патларни юлиш енгил бўлиши учун қайнаб турган сувга 10 сонияга солиб олиб, кейин юлинади. Бундан ташқари яна эритилган парафинга ҳам солиб, совугандан кейин жуда осонлик билан пати юлиб ташланади, асосийси, сифатли юлинади. Бедана таначасидан патларини тозалаш учун хўжаликларда махсус ярим автомат машина қўлланилади. Беданатаначасипатлардан тозалангандан кейин чала қолган майда патларини куйдириш учун енгил оловга айлантириб олинади. Сўнг оёқчалари кесиб ташланади, олд қисмидан узунасига кесилади ва ичак-чавоқлари клоакасининг тери атрофи билан кесиб олинади. Кейин бедана таначаси совуқ сувда ювиб олинади. Агар сувда кўпроқ туриб қолса гўштнинг таъм сифати пасаяди. Ишлатиш ёки музлатиш учун тайёр бўлган гўштни 0+4 °C ҳароратда ва нисбий намлиги 80% бўлган жойда уч кунгача сақлаш мумкин. Музлатиш учун енгил шамоллатилган (қуритилган) ва устида сув томчилари бўлмаган гўшт таначалари қўлланилади. Музланган бедана таначалари уй ҳароратида ёки микротўлқинли мосламада эритилади.

I **ФОЙДАЛАНИЛГАН АДАБИЁТЛАР РЎЙХАТИ**

1. Сметнев С. М. Птицеводство. – М.: 2001.
2. Бобоев К. Х. Паррандачилик: Маъруза матни. Тошкент : 2002.
3. Туркия Республикаси “Озиқ-овқат қишлоқ хўжалиги вазирлиги” ҳамда “Denizbank” ҳамкорлигида тайёрланган “100 та китобдан” иборат тўплами.
4. Кочиш И. И. Птицеводство. М.: Колос, 2001.
5. Нормухумедов Х. И., Рахматуллаев П.Э. Беданани парваришlash бўйича тавсиялар. – Тошкент : 2014.
6. Нормухумедов Х. И., Рахматуллаев П. Э. «Ўзбекистон паррандачилиги» илмий-оммабоп, ахборот-маърифий журнал. – Тошкент : 2019.

Интернет сайтлар

<https://svoya-ptica.com/>

<https://1perepel.ru/>

<https://eco-ferma24.ru/>



Lined area for writing, consisting of 20 horizontal green lines.

This image shows a single sheet of white paper with horizontal green ruling lines. The lines are evenly spaced and run across the width of the page. There are no margins, text, or other markings on the paper.

46.8
Б 46

Беданаларни парваришlash [Матн] : илмий нашр /
«Агробанк» АТБ.-Тошкент: "ТАСВИР" нашриёт уйи, 2021. - 48 б.

ISBN 978-9943-7174-0-4

УЎК 639.122

КБК 46.8

**Лойиҳа ғояси муаллифи ва ташкилотчиси
“Агробанк” АТБ**

100 китоб тўплами

БЕДАНАЛАРНИ ПАРВАРИШЛАШ

84-китоб

***Нашриёт уйи “Тасвир”
Тошкент – 2021***

Таржимонлар:

Тошкент давлат шарқшунослик университети
“Таржима ва тил маркази” таржимонлар гуруҳи

Муҳаррир-мусахҳих:

М. Тожимаматова

Компьютерда тайёрловчилар:

З.Б. Хошимов, Н.С. Сайидахмадов

Дизайнер:

Д. Иванов

Нашриёт тасдиқномаси: № 7404, 02.02.2021
Босишга 16.04.2021 да рухсат этилди. Бичими 60x84 ¹/₁₆
Fira Sans гарнитураси. Офсет босма усулида чоп этилди.
Адади 830 нусха. Буюртма рақами: 1112

“Colorpack” МЧЖ босмахонасида чоп этилди.
Тошкент шаҳар, Янги шаҳар кўчаси, 1А.